



Komunikadu Imprensa **13 Maiu 2020**

Ministériu Públiku no Tribunál presiza konsidera kazu sira Violénsia Bazeia ba Jéneru hanesan kazu urjente iha situasaun Estadu Emerjénsia

JSMP no ALFeLa husu ba Ministériu Públiku (MP) no Tribunál atu konsidera no fó prioridade hodi kontinua prosesa no julga kazu sira ho natureza Violénsia Bazeia ba Jéneru (VBJ) liu-liu violasaun seksuál, abuzu seksuál ba menór ka eskplorasau seksuál ba feto no labarik hanesan mós kazu urjente sira seluk¹ ne'ebé tribunál kontinua atende iha situasaun Estadu Emerjénsia ida ne'e.

“MP no tribunál tenke fó prioridade hodi halo dilijénsia no julga kazu sira Violénsia Bazeia ba Jéneru liu-liu kazu sira ho natureza violasaun seksuál, abuzu seksuál ba menór ka eskplorasau seksuál ba feto no labarik iha Estadu Emerjénsia ida-ne'e, tanba kazu sira ne'e mós ho karakter urjente, envolve feto no labarik nu'udar ema vulnerável ne'ebé presiza iha tratamentu no protesaun espesiál liu-liu ba vítima menoridade sira tantu relaciona ho presaun psikolojia nune'e mós atu aseguara prova sira no prevene krime akontese fila-fila (repetidus) hasoru vítima sira,” dehan Sra. Ana Paula Marçal, Diretóra Ezekutiva JSMP.

Tuir dadus ne'ebé JSMP hetan husi PNTL liuhusi VPU (Unidade ba Ema Vulneravel) iha Munisípiu Aileu, Same, Baukau no Oekusi katak durante Janeiru to'o Abril 2020, VPU rejista kazu barak envolve kazu VBJ inklui violénsia seksuál ne'ebé mak feto no labarik sai vítima. Kazu hirak ne'e, balun rejistu ona iha MP maibé kazu balun seidak relata ba iha MP tanba situasaun Estadu Emerjénsia ligadu ho prevensaun pandemia COVID-19.

Tuir mai tabela kona-ba totál kazu sira ne'ebé JSMP rekolla hosi sorumutu ho VPU Munisípiu sira.

Tipu kazu	Aileu (Jan-Abril 20)	Manufahi (Jan-Abril 20)	Baukau (Jan-Maiu 20)	Oekusi (Jan-Abril 20)	Total
Violénsia Doméstika	15	5	14	27	63
Violasaun seksuál	3	-	2	1	6
Abuzu seksuál ba menór	-	-	1	-	1
Esplorasau seksuál	1	-	-	-	1

¹ Kazu urjente sira hanesan julgamentu sumáriu, primeiru interrogatóriu, kazu ne'ebé arguidu iha hela prezu/detidu iha prizaun no kazu sira ne'ebé tenke hetan desizaun.

Aktu seksuál ho adolescente	-	-	1	-	1
Pornografia infantíl	-	-	-	1	1
Maus tratus ba kónjuje	-	-	1	8	9
Maus tratus ba menór	-	-	-	1	1
Total	19	5	19	38	81

Dadus husi VPU Aileu no Same, JSMP rekolla bainhira JSMP halo asaun karidade no halo atividade prevensaun ba COVID-19 iha distritu rua² ne'e iha loron 5-6 Maiu 2020, hodi distribui nesabilidade báziku, maskra no sabaun fase liman ba ema kbiit la'ek sira, inklui feto-faluk-oan kiak, ema ho defisiénsia no mós vítima feto, labarik, defisiénsia no LGBTI.

Enkuantu dadus husi ALFeLa nian ne'ebé mak fornese assisténsia legál ba feto no labarik sira ba kazu violasaun seksuál, abuzu seksuál ba menór, violénsia doméstika ka violénsia bazeia ba jéneru durante Estadu Emerjénsia hamutuk kazu 47. Kazu sira ne'e balun rejistu ona iha MP no balun sei prosesu iha nivel VPU hodi kompletu prova sira, maibé kazu balun husi VPU Aileu hamutuk 10 hanesan kazu abuzu seksuál ba menór, violasaun seksuál no violénsia doméstika mak seida'uk konsege rejistu iha MP tanba Estadu Emerjénsia.

Aleinde ne'e dadus husi ALFeLa katak vítima feto ho labarik sira iha kazu Violénsia Bazeia ba Jeneru ne'ebé mak akontese durante Estadu Emerjénsia, balun tenke ba hela iha Uma Mahon sira bainhira sira iha situasaun ameadu husi autór krime sira hodi hein sira nia prosesu iha sistema justisa formál.

Tuir mai tabela kona-ba totál kazu ne'ebé mak ALFeLa fornese assisténsia legál durante Estadu Emerjénsia iha Munisípiu sia (9) inklui RAEOA.

Fulan	Baukau	Kovalima	Dili	Ermera	Likisá	Manatuto	Manufahi	Oekusi	Vikeke	Total
Abril	3	2	11	1	3	1	1	7	2	31
Maiu	4	1	5	-	1	-	4	1	-	16
Total	7	3	16	1	4	1	5	8	2	47

Dadus sira husi JSMP no ALFeLa ne'e diferente, tanba dadus sira husi ALFeLa, aleinde kazu balun hetan husi VPU, kazu balun mós vítima sira keixa direktamente ba iha ALFeLa no mós refere husi parseiru sira husi Munisípiu sia. Enkuantu dadus husi JSMP hetan direita husi VPU sira husi Munisípiu haat hanesan mensiona iha leten.

² Munisípiu Aileu : aldeia Besilau, Malerek, Montane no Munisípiu Same : aldeia Nuu-laran, Betano no Holarua

Bazeia ba dadus hirak ne'e, JSMP no ALFeLa husu Ministériu Públiku no Tribunál atu konsidera no tau prioridade ba kazu violénsia bazea ba jéneru hanesan mós kazu urjente sira seluk durante EE.

JSMP no ALFeLa konsidera presiza iha mós sistema ida ne'ebé seguru no apropriadu hodi fasilita prosesu sira. Hanesan haktuir ona iha JSMP nia komunikadu imprensa ne'ebé pública iha 15 Abril 2020³ JSMP rekomenda nafatin atu tribunál halo kordenasaun ho instituisaun relevante sira hanesan Polísia, Ministériu Públiku, Defensoria Públiku no Prizaun hodi diskute no estabelese sistema ida seguru hodi bele fasilita prosesu sira. Nune'e kazu ho natureza violasaun seksuál, abuzu seksuál ba menór no violénsia doméstika bele kontinua halo julgamentu no bele aseguara prova sira no iha ikus hetan desizaun ida ne'ebé justu no mós hamenus kazu pendente sira.

Aleinde ne'e, JSMP no ALFeLa mós kontinua rekomenda ba Ministériu Públiku no Tribunál atu hahuu hanoin ona mekanizmu própriu ba tempu naruk nian bainhira tribunál kontinua halo julgamentu ba kazu urjente sira inklui kazu sira ne'ebé merese atu julga hanesan kazu VBJ liuliuli kazu ho natureza violasaun seksuál, abuzu seksuál ba menór ka eskplorasau seksuál ba feto no labarik ho nafatin halo tuir estandarte prevensaun ba surtu COVID 19 husi WHO no Ministériu Saúde nian nune'e nafatin serbisu ho seguru.

Aleinde relata kona-ba total kazu sira ne'ebé sira rejista, VPU sira mós informa katak VPU kuaze iha munisípiu tomak hasoru problema hanesan mak menus transporte no kombustivel ne'ebé halo sira susar atu atende kazu sira ho lalais.

Iha sorumotu ho VPU sira, JSMP mós apresenta programa kona-ba atu fó mós asisténsia ba feto no labarik no oinsa atu estebele relasaun serbisu entre JSMP no VPU iha futuru ho serbisu hamutuk ho ALFeLa.

Atu hetan infórmasaun kompletu bele kontaktu:

Ana Paula Marçal
DiretóraEzekutiva JSMP
Email: ana@jsmp.tl
Telefóne: 3323883 | 77040735
Website: <http://jsmp.tl>

Antoninho Marques
Diretór Ezekutivu ALFeLa
Email: antoninho.marques@alfela.tl
Telefone: 3310282 | 77432096

³ Press release ho titlu “Tribunál kontinua hala’o julgamentu ba kazu urjente sira iha situasaun estadu emerjénsia JSMP rekomenda atu utiliza meu sira no kondisaun ne'ebé apropriadu no seguru http://jsmp.tl/wp-content/uploads/PrTribunálKontinuaJulgaKazuUrgensiaIhaEE_Tetum.pdf